

M'sia catat pertumbuhan 8.9 peratus suku kedua 2010

Malaysiakini.com

August 18, 2010

Ekonomi Malaysia berkembang pada kadar 8.9 peratus dalam suku kedua 2010 dipacu oleh permintaan domestik dan luaran yang kukuh. Ia bagaimanapun sedikit berkurangan berbanding pertumbuhan 10.1 peratus yang dicatatkan pada suku pertama tahun ini.

Dengan perkembangan itu, Gabenor Bank Negara, Tan Sri Zeti Aziz berkata keluaran dalam negara kasar (KDNK) bagi enam bulan pertama tahun ini dicatatkan pada kadar 9.5 peratus.

Katanya, permintaan domestik pula berkembang pada kadar 9 peratus berbanding hanya 5.3 peratus pada suku pertama.

Menurut Zeti, pencapaian itu mencerminkan ekonomi Malaysia dalam landasan kukuh untuk mencatat pertumbuhan tinggi melebihi 6.0 peratus bagi keseluruhan tahun ini.

Kesan krisis kewangan global 2008-2009 menyaksikan ekonomi Malaysia menguncup sepanjang sembilan bulan pertama tahun lalu, sebelum pulih dengan catatan pertumbuhan 4.5 peratus pada suku keempat 2009.

Copyright © 1999-2007 Mkini Dotcom Sdn. Bhd.

Source : <http://www.malaysiakini.com/news/140461>